

六祖惠能大師等合註

金剛般若波羅蜜經註

金剛般若波羅蜜經序

六祖大鑑禪師著

夫金剛經者。無相爲宗。無住爲體。妙有爲用。自從達摩西來。爲傳此經之意。令人悟理見性。祇爲世人不見自性。是以立見性之法。世人若了見真如本體。即不假立法。此經讀誦者無數。稱贊者無邊。造疏及注解者。凡八百餘家。所說道理。各隨所見。見雖不同。法即無二。宿植上根者。一聞便了。若無宿慧。讀誦雖多。不悟佛意是故解釋聖義斷除學者疑心。若於此經得旨無疑。不假解說從上如來所說善法。爲除凡夫不善之心。經是聖人之語。教人聞之從凡悟聖。永息迷心。此一卷經。衆人性中本有。不自見者。但讀誦文字。若悟本心。始知此經。不在文字。若能明了自性。方信一切諸佛。從此經出。今恐世人身外覓佛。向外求經。不發內心。不

持內經。故造此訣。令諸學者。持內心經。了然自見清淨佛心。過於數量。不可思議。後之學者。讀經有疑。見此解義。疑心釋然。更不用訣。所冀學者。同見鑛中金性。以智慧火鎔鍊。鑛去金存。我釋迦本師。說金剛經在舍衛國。因須菩提起問。佛大悲爲說。須菩提。聞法得悟請佛與法安名。令後人依而受持。故經云。佛告須菩提。是經名爲金剛般若波羅蜜。以是名字。汝當奉持。如來所說金剛般若波羅蜜。與法爲名。其意謂何。以金剛世界之寶。其性猛利。能壞諸物。金雖至堅。羚羊角能壞。金剛喻佛性。羚羊角喻煩惱。金雖堅剛。羚羊角能碎。佛性雖堅。煩惱能亂。煩惱雖堅。般若智能破。羚羊角雖堅。寶鐵能壞。悟此理者。了然見性。涅槃經云。見佛性者。不名衆生。不見佛性。是名衆生。如來所說金剛喻者。祇爲世人性無堅固。口雖誦經。光明不生。外誦內行。光明齊等。內無堅固。定慧即亡。口誦心行。定慧均等。是名究竟。金在山中。山不知是寶。寶亦

不知是山。何以故。爲無性故。人則有性。取其寶用。得遇金師。鑿鑿山破。取鑛烹鍊。遂成精金。隨意使用。得免貧苦。四大身中。佛性亦爾。身喻世界。人我喻山。煩惱喻鑛。佛性喻金。智慧喻工匠。精進猛勇喻鑿鑿。身世界中有人我山。人我山中有煩惱鑛。煩惱鑛中有佛性寶。佛性寶中有智慧工匠。用智慧工匠。鑿破人我山。見煩惱鑛。以覺悟火烹鍊。見自金剛佛性。了然明淨。是故以金剛爲喻。因爲之名也。空解不行。有名無體。解義修行。名體俱備。不修即凡夫。修即同聖智。故名金剛也。何名般若。是梵語。唐言智慧。智者不起愚心。慧者有其方便。慧是智體。智是慧用。體若有慧。用智不愚。體若無慧。用愚無智。祇爲愚癡未悟。故修智慧以除之也。何名波羅蜜。唐言到彼岸。到彼岸者。離生滅義。祇緣世人性無堅固。於一切法上。有生滅相。流浪諸趣。未到眞如之地。並是此岸。要具大智慧。於一切法圓滿。離生滅相。即是到彼岸。亦云。心

此岸。心悟則彼岸。心邪則此岸。心正則彼岸。口說心行。即是法身。有波羅蜜。口說心不行。即無波羅蜜也。何名爲經。經者。徑也。是成佛之道。凡人欲臻斯路當內修般若行。以至究竟。如或但能誦說。心不依行。自心則無經。實見實行。自心則有經。故此經如來號爲金剛般若波羅蜜經。

六祖慧能大師事實

師姓盧。其先范陽人。家甚貧窶。師樵採自給。一日負薪。入市中。聞客讀金剛經。遂悚然感悟。矢志尋師。至韶州。遇女尼。無盡藏者。誦涅槃經。師暫聽之。即爲解說其義。尼乃執卷問字。師曰。字即不識。義即請問。尼曰。字尙不識。安能會義。師曰。諸佛妙理。非關文字。尼大異之。遍告居人。競來瞻禮。一日師。自念曰。我求大法。豈可中道而止。明日

遂行。至昌樂西山石室。遇智遠禪師。指示叅謁黃梅師。竟往焉。忍大師一見默而識之。授以衣法。令隱於懷。至儀鳳元年。屈南海遇印宗禪師。講經於法性寺。師止廊廡聽受。入夜。風颺刹幡。二僧對論。一云風動。一云幡動。往復酬答。未曾契理。師不覺言曰。風幡非動。動自心耳。印宗悚然異之。邀師入室。執弟子禮。乃告四衆曰。印宗具足凡夫。今遇肉身菩薩。因請出所傳信衣。悉令瞻拜。明年二月。韶州刺史韋據。請於火焚寺。轉妙法輪。門人紀錄曰。爲壇經。盛行於世。後返曹溪。雨大法雨。學者不下千數。中宗神龍元年。遣內侍薛簡。馳詔迎請。師上表辭謝。薛簡曰。弟子回朝。主上必問。願慈悲指示。心要如何明道。師曰。道無明暗。明暗亦是代謝之義。明明無盡。亦是有盡。相待立名。簡曰。明喻智慧。暗況煩惱。倘不以智慧。照破煩惱。無始生死。憑何出離。師曰。以智慧照煩惱。此是二乘。小兒羊鹿等智。上智大根。悉不如是。簡曰。如何是大

乘見解。師曰。明與無明。其性無二。無二之性。即是實性。性者處凡愚而不減。在聖賢而不增。住煩惱而不亂。居禪定而不寂。不斷不常。不來不去。不在中間。不在內外。不生不滅。性相如如。常住不遷。名之曰道。簡豁然大悟。歸闕表奏師語。加賜摩納袈裟絹鉢等物。師說法利生。經四十餘載。一日謂門人曰。吾欲返新州。宜速理舟楫。大眾哀請。乞師少住。師曰。諸佛出世。猶示涅槃。有來必去。理亦自然。言訖。往新州國恩。流浴跏趺而化。異香襲人。白虹屬地。時先天二年也。

金剛般若波羅蜜經

梁昭明太子蕭統分章

姚秦三藏法師鳩摩羅什譯

六祖大鑑禪師等合註

龍溪孫雲鴻復生

侯官楊浚雪滄

重梓

金剛者。堅利之物。能破萬物也。般若者。梵語也。唐言智慧。善破一切煩惱。轉爲妙用。波羅蜜者。梵語也。唐言到彼岸。不著諸相。謂之彼岸。若著諸相。謂之此岸。又云心迷則此岸。心悟則彼岸。經者。徑也。見性之徑路也。

法會因由分第一

如是我聞。一時佛在舍衛國。祇樹給孤獨園。與大比丘衆。千二百五十人俱。

如是我聞者。如來臨涅槃日。阿難問曰。佛滅度後。一切經首。初安何字。佛言初安如是我聞。次顯處所。如者。衆生之性。萬別千差。動靜不一。無可比類。無可等倫。是者。即是衆生性之別名。離性之外。更無別法。又云。法非有無。謂之如。皆是佛法。謂之是。我者。爲性自在。強名之也。聞者。聽聞也。一時者。謂說理契機。感應道交之時也。佛者。梵音。唐言覺也。內覺無諸妄念。外覺不染六塵。又云教主也。非相而相。應身佛也。相而非相。報身佛也。非相非非相。法身佛也。在者。所在之處。舍衛國者。說經之處也。祇樹者。祇陀太子所施之樹。樹謂法林也。給孤

獨園者。給孤長者所施之園。共建立精舍也。比丘者。去惡取善。名小比丘。善惡俱遣。名大比丘也。若人悟達此理。即證阿羅漢位。能破六賊小乘四果人也。

爾時。世尊食時。著衣持鉢。入舍衛大城。乞食於其城中。次第乞已。還至本處。飯食訖。收衣鉢。洗足已。敷座而坐。

爾時者。佛現世時也。世尊者。三界四生中。智慧福德。無有等量。一切世間之所尊也。食時者。正當辰食將辦之時也。著衣者。柔和忍辱衣也。乞食者。欲使後世比丘。不積聚財寶也。次第者。如來慈悲。不擇貧富。平等普化也。洗足已者。淨身業也。敷座而坐者。一切法空是也。

善現起請分第二

時長老須菩提。在大衆中。即從座起。偏袒右肩。右膝著地。合掌恭敬。而白佛言。希有世尊。如來善護念諸菩薩。善付囑諸菩薩。

時者。空生起問之時也。長老者。德尊年高也。須菩提者。梵語也。唐言解空是也。解空第一。故先起問。右膝著地者。先淨三業。權伏身心。整儀贊佛也。合掌者。心合於道。道合於心也。希有者。我佛性能含容萬法。無可比類也。如來者。如者不生。來者不滅。非來非去。非坐非臥。心常空寂。湛然清淨也。善護念者。善教諸人。不起妄念也。諸菩薩者。諸者不一之義。菩者。言照。薩者。言見。照見五蘊皆空。謂色受想行識也。菩薩者。梵語也。唐言道心。衆生常行恭敬。乃至鱗甲羽毛。蛆蟲螻蟻。悉起敬愛之心。不生輕慢。此佛所謂蠢動含靈。皆有佛性也。善付囑者。

念念精進。勿令染著。前念纔著。後念即覺。勿令接續也。

世尊。善男子。善女人。發阿耨多羅三藐三菩提心。云何應住。云何降伏其心。

善男子者。正定心也。善女人者。正慧心也。謂有剛斷決定之心。永無退轉也。發心之義。阿者。無也。無諸垢染也。耨多羅者。上也。三界無能比也。三者。正也。正見也。藐者。徧也。一切有情。無不徧有。三菩提者。知也。知一切有情。皆有佛性也。云何降伏其心。是謂凡夫妄念。煩惱無邊。當依何法即得調伏。

佛言。善哉善哉。須菩提。如汝所說。如來善護念諸菩薩。善付囑諸菩薩。汝今諦聽。當爲汝說。善男子善女人。發阿耨多羅三藐三菩提心。應如是住。如是降伏其心。唯然世

尊。願樂欲聞。

如汝所說者。是佛讚嘆須菩提能知我意。善教諸人。不起妄念。心常精進。勿令染著諸法相也。諦聽者。諦者。名了。汝當了達聲塵。本來不生。勿逐語言。詳審而聽也。應如是住者。如來欲令衆生之心。不生不滅。湛然清淨。即能見性也。黃柏運禪師云。凡夫多被境礙心。事礙理。常欲逃境以安心。屏事以存理。不知乃是心礙境。理礙事。但令心空境自空。理寂事自寂。勿倒用心也。如是降伏其心者。若見自性。即無妄念。既無妄念。即是降伏其心矣。唯者。應諾之辭。然者。協望之謂。願樂欲聞者。欣然欲聞其法也。

大乘正宗分第三

佛告須菩提。諸菩薩摩訶薩。應如是降伏其心。所有一切

衆生之類。若卵生。若胎生。若溼生。若化生。若有色。若無色。若有想。若無想。若非有想。若非無想。我皆令入無餘涅槃而滅度之。如是滅度無量無數無邊衆生。實無衆生得滅度者。何以故。須菩提。若菩薩有我相。人相。衆生相。壽者相。即非菩薩。

摩訶薩者。摩訶言大。心量廣大。不可測量。乃是大悟人也。衆生者。謂於一切善惡凡聖等見。有取捨心。起無量無邊煩惱妄想。輪迴六道是也。若卵生者。貪著無明。迷昧包覆也。若胎生者。因境來觸。遂起邪心也。若溼生者。纔起惡念。即墜三塗。謂貪嗔癡。因此而得也。若化生者。一切煩惱。本自無根。起妄想心。忽然而有也。又教中云。一切衆生。不自具足。隨業受報。故無明爲卵生。煩惱包裹爲胎生。愛水浸淫爲溼生。歟

起煩惱爲化生也。又云眼耳鼻舌。不能迴光內燭。有所貪漏。即墜四生。謂胎卵溼化是也。色聲香味。迴光內燭。無所貪漏。即證四果。謂須陀洹等是也。若有色者。謂凡夫執著之心。妄見是非。不契無相之理。若無色者。執著空相。不修福慧。若有想者。眼見耳聞。遂生妄想。口說佛行。心不依行。若無想者。坐禪除妄。猶如木石。不習慈悲智慧方便。若非有想者。教中云。有無俱遣。語默雙亡。有取捨憎愛之心。不了中道也。非無想者。謂有求理心也。我者。佛自謂也。皆者。摠也。令者。俾也。入者。悟入也。無餘者。眞常湛寂也。法華經云。佛當爲除斷。令盡無有餘。涅槃者。菩薩心無取捨。如大月輪。圓滿寂靜。衆生迷於涅槃無相之法。而爲生死有相之身也。滅者。除滅。度者。化度也。無量無數無邊衆生者。謂起無量無數無邊煩惱也。得滅度者。既已覺悟。心無取捨。無邊煩惱。轉爲妙用。故無衆生可滅度也。有我相者。倚恃名位權勢。財寶藝學。攀高接

貴。輕慢貧賤。愚迷之流。人相者有能所心。有知解心。未得謂得。未證謂證。自恃持戒。輕破戒者。衆生相者。謂有苟求希望之心。言正行邪。口善心惡。壽者相者。覺時似悟。見境生情。執著諸相。希求福利。有此四相。即同衆生。非菩薩也。

妙行無住分第四

復次。須菩提。菩薩於法。應無所住。行於布施。所謂不住色布施。不住聲香味觸法布施。須菩提。菩薩應如是布施。不住於相。何以故。若菩薩不住相布施。其福德不可思量。

復次者。連前起後之辭。菩薩於法者。摠該一切空有之法也。應無所住者。一切之法。應當無所住著也。法華經云。十方國土中。惟有一乘法。謂一

心也。心即是法。法即是心。二乘之人。不能解悟。謂言心外。即別有法。遂生執著。住於法相。此同衆生之見解也。行於布施者。布者。普也。施者。散也。謂除我人衆生壽者四相。煩惱妄相。取捨憎愛之心。世尊即以教法布施。內破一切執著。外即利益一切衆生。菩薩布施。皆應無住。不見有我。爲能施人。不見有他。爲受施者。不見中間。有物可施。三體皆空。住無所住。清淨行施。不憂已乏。中望報恩。不求果報也。凡夫布施。希求福利。此是住相布施也。不住色布施者。謂智慧性。照見一切皆空也。梵語名檀波羅蜜。此名布施。不住聲者。清淨無罣礙也。梵語名尸羅波羅蜜。此名持戒。二乘之人。意謂從聲色起。遂向聲塵中分別。聞樂則喜。聞悲則哀。欲捨此聲而取無聲。名之爲戒。菩薩無聲可捨。色若是有。聲從是生。色既本空。聲從何起。若能如是悟者。雖在生死中。生死不能拘。雖在六塵中。六塵不能染。在在處處。心常清淨。不住香者。謂見色清淨

也。梵語云。羸提波羅蜜。此名忍辱。二乘之人。妄生忍辱。惟恐貪著。欲行遠離。故名忍辱。正是捨色取空。不了中道也。殊不知香性本空。菩薩忍亦無忍。辱亦無辱。須是自性清淨。不生起滅之心。方始悟明心地。不住味者。謂衆生性。與如來性。無所分別也。梵語名毘耶波羅蜜。此名精進。了知舌根本空。爲不住味故云。受諸飲食。當如服藥。或好或弱。不可生憎愛也。不住觸者。謂心無取捨也。內無菩提可取。外無煩惱可捨。梵語名。禪波羅蜜。此名禪定。二乘之人。認觸爲色身。色身若是有。即言離諸觸。色身既本無。諸觸何曾有。又云了觸即無生。不住虛分別。一切諸萬法。本來無所動。六祖云。一切萬法。皆從心生。心無所生。法無所住。不住法者。謂照見身心法相空也。梵語名般若波羅蜜。此名智慧。諸法屬意。意屬識。此識是妄。金剛三昧經云。所見境界非我本識。二乘之人。分別諸相。皆是妄識。本識又何可得也。菩薩了知本識。究竟。故

無外分。黃蘗云。本是一精明。分爲六和合。一精明者一心也。六和合者六根也。各與塵合。眼與色合。耳與聲合。鼻與香合。舌與味合。身與觸合。意與法合。中間生六識。爲十八界。若了十八界。無所有。一切皆空。束六和合。爲一精明。此乃了悟之人。唯有真心蕩然。清淨菩薩應如是布施者。謂捨除一切煩惱憎愛之心也。然煩惱本空。皆是妄見。有何可捨。經云。一切諸有。如夢如幻。一切煩惱。是魔是賊。夫見性之人。十二時中。凡遇逆順境界。心即安然。不隨萬境所轉。一任毀謗於我。我既不受惡言。謗黷返自歸己。所謂自作自受者也。譬如有人手執火炬。擬欲燒天。徒自疲困。終不可得。故古德云。心隨萬境轉。轉處實能幽。隨流認得性。無喜復無憂。不住於相者。非但見色是相。一切種種分別。皆心爲相。如是之相。皆從因緣而生。應知一切分別。皆如夢幻。遇緣即施。緣散即寂。是故佛言。凡所有相。皆是虛妄。又西明和尚云。法相若有。可言住諸

相。法相既本無。故言不住相。既不住相布施。其福德更有何思量。

須菩提。於意云何。東方虛空。可思量不。不也。世尊。
須菩提。南西北方。四維上下。虛空可思量不。不也。世
尊。須菩提。菩薩無住相布施。福德亦復如是。不可思量
。須菩提。菩薩但應如所教住。

不也。世尊者。須菩提謂虛空我思量之。實無可思量也。不可思量者。既
已覺悟。心無能所。即無我人衆生壽者四相。豈更有可思量。但應如所教
住者。乃謂諸學人。當依佛教。住無所住。必得悟入也。

如理實見分第五

須菩提。於意云何。可以身相見如來不。不也。世尊。不
可以身相得見如來。何以故。如來所說身相。即非身相。

不可以身相得見如來者。須菩提謂色身既有相。法身即無相。色身者。地水火風。假合成人。法身者即無形狀相貌。色身即是凡夫。法身即是如來。須菩提以凡夫但見色身。不見法身。故答是語。如來所說身相。即非身相者。非者無也。凡夫謂色身是有。執著修行。所以不見佛性。生死轉重。如來法身無相。故言所說身相。非身相也。華嚴經云。佛以法爲身。清淨如虛空。故雲門大師云。我當時若見一棒打殺。與狗子喫者。此大乘先覺之人。解黏去縛。遣疑破執也。

佛告須菩提。凡所有相。皆是虛妄。若見諸相非相。即見如來。

凡所有相。皆是虛妄者。虛則不實。妄則不真。既不真實。相即非相。又云。非獨佛身。相即無相。凡所有相。皆是虛妄。色身有相。故言虛妄。

法身無相。故言非相也。若見諸相非相。即見如來者。言身虛妄。即是人空。言非相者即是法空。若悟人法二空。即見自性。法華經云。一切諸相。皆悉空寂。又云或見菩薩。觀諸法性。無有二相。猶如虛空。

正信希有分第六

須菩提白佛言。世尊。頗有衆生。得聞如是言說章句。生實信不。佛告須菩提。莫作是說。如來滅後。後五百歲。有持戒修福者。於此章句。能生信心。以此爲實。

得聞如是言說章句。生實信不者。須菩提。謂前以無相。行於布施。即是因深。得見無相如來。即是果深。既談因果。切恐如來滅後。濁劫惡世之中。無人聽信。故有是問。有持戒修福者。不著諸相。即是持戒心常空寂。

無諸妄念即是修福。此人不被諸境所惑。能生信心。以此爲實。

當知是人。不於一佛二佛。三四五佛。而種善根。已於無量千萬佛所。種諸善根。聞是章句。乃至一念生淨信者。須菩提。如來悉知悉見。是諸衆生。得如是無量福德。

不於一佛二佛者。一劫千佛出世也。種諸善根者。世間種種善事。不可勝計。大槩止是諸惡莫作。衆善奉行。是也。法華經云。隨宜方便事。無復諸疑惑。心生大歡喜。自知當作佛。乃至一念生淨信者。謂凡夫於諸法中。起一切善惡凡聖等見。有取捨心。種種妄念。不能生淨信者。菩薩了悟人法二空。無諸妄念。心常清淨。聽信其法。故言一念生淨信也。得如是福者。此謂如來知見衆生。無諸妄念。心常清淨。敬信其法。所得智慧勝妙。功德不可測量。

何以故。是諸衆生。無復我相人相衆生相壽者相。無法相。亦無非法相。

無復我人衆生壽者相者。謂不倚恃名位權勢財寶藝學。精進持戒。輕慢貧賤愚癡懈怠破戒之流。無能所知解之心。無苟求希望之心。言行相應也。無法相者。經云。心生則一切法生。心滅則一切法滅。心既清淨。諸法皆空。故無取捨。一切善惡凡聖等見諸法相也。亦無非法相者。謂不著能知解心。不作有所得心。無人無法。內明實相。外應虛緣也。圓悟禪師云。伶俐漢脚跟須點地。脊梁要硬似鐵。遊人間世。幻視萬緣。把住作主。不徇人情。截斷人我。脫去知解。直下以見性成佛。直指妙心。爲階梯及至作用。外應虛緣不落窠臼。辦一片長久。守著寂淡身心。於塵勞中透脫去。此乃善之又善也。

何以故。是諸衆生。若心取相。即爲著我人衆生壽者。若取法相。即著我人衆生壽者。何以故。若取非法相。即著我人衆生壽者。是故不應取法。不應取非法。

心若取相。即取妄念故著我人衆生壽者相也。佛與衆生。唯止一心。更無差別。此心無始以來無形無相。不曾生。不曾滅。當下便是。動念則乖。猶如虛空。無有邊際。惟此一心。即便是佛。佛與衆生。更無別異。但是衆生著相外求。求之轉失。使佛覓佛。將心提心。窮劫盡形。終無所得。不知息念亡慮。佛自現前。此心即是佛。佛即是衆生。爲衆生時。此心不滅。爲諸佛時。此心不添。遇緣則施。緣散則寂。不假修證。本自具足。若不決定。信此是佛。縱使屢劫修行終不成道。取法相者。謂言心外有法。故著諸相也。黃蘗云。造惡造善。皆是着相。着相造惡枉受輪迴。着相造

善枉受勞苦。都總不如便自認取本心。心外無法。此心即法。法外無心。將心無心。心卻成有。一切在我默契而已。若取非法相者。謂有取捨善惡凡聖等相也。不應取法。不應取非法者。此謂有無俱遣。語默雙亡。若取法相。即有法執。若取非法相。即有空執。有執則煩惱熾然。無執則信心清淨。

以是義故。如來常說。汝等比丘。知我說法。如筏喻者。法尚應捨。何況非法。

執有說空。因何用筏。有執既喪。空說奚存。既是渡河。那更存筏。法尚應捨。何況非法者。經云。若人欲識佛境界。當淨其意如虛空。外無一法而建立。法尚應捨。何況非法乎。

無得無說分第七

須菩提。於意云何。如來得阿耨多羅三藐三菩提耶。如來有所說法耶。須菩提言。如我解佛所說義。無有定法。名阿耨多羅三藐三菩提。亦無有定法。如來可說。

如來有所說法耶者。佛所問意。恐謂如來有所說也。無有定法者。根器有利鈍。學性有淺深。隨機設教。對病用藥。法華經云。諸根利鈍。精進懈怠。隨其所堪。而爲說法。是故法無定相。迷悟懸殊。若未悟時。似無所得。若悟了時。似有所得。得與不得。皆是妄見。但不可執著。自契中道。豈有定法可說耶。

何以故。如來所說法。皆不可取。不可說。非法非法。

不可取者。空生深恐學人。不悟如來無相之理。不可說者。深恐學人執著如來所說章句也。非者無也。非非者不無也。黃蘗云。法本不有。莫作無

見。法本不無。莫作有見。謂無即成斷滅。語有即成邪見。

所以者何。一切賢聖。皆以無爲法。而有差別。

無爲法性。本無淺深定相可取。若有定相。應無差別。有差別者。謂性有利鈍。學有淺深。故名差別。既有差別。即無定相也。

依法出生分第八

須菩提。於意云何。若人滿三千大千世界。七寶以用布施。是人所得福德。甯爲多不。須菩提言。甚多世尊。何以故。是福德。即非福德性。是故如來說福德多。

三千大千世界七寶布施。此是住相布施。希求福利。得福雖多。而於識心見性。了無所得。傳大士云。寶滿三千界。齋持作福田。惟成有漏業。終不離人天。故知住相布施。即非福德性。若人心無能所。識心見性。方名

福德性也。

若復有人。於此經中受持。乃至四句偈等。爲他人說。其福勝彼。

受持者。身口意。皆清淨是也。曉解經義。依教而行。如船入海。無所不通。意名受持。既不解經義。而又懈怠。心口相違。如入溝港。即有斷絕。非受持也。四句偈者。百丈云。眼耳鼻舌。各各若不貪染一切諸法。是名受持四句偈。亦名四果仙人。亦名六通羅漢。若能受持。乃至四句偈等。功德廣大。勝彼三千大千世界七寶布施也。

何以故。須菩提。一切諸佛。及諸佛阿耨多羅三藐三菩提法。皆從此經出。

無相福德。生出應身。無相智慧。顯出真身。謂從此己心中。出菩提法也。

須菩提。所謂佛法者。即非佛法。

二乘之人。執著諸相。以爲佛法。遂乃向外尋求。菩薩於諸佛法。都無染著。亦不捨離。見如不見聞如不聞。心境空寂。自然清淨。是故佛法非佛法也。

一相無相分第九

須菩提。於意云何。須陀洹。能作是念。我得須陀洹果不。須菩提言。不也。世尊。何以故。須陀洹。名爲入流。而無所入。不入色聲香味觸法。是名須陀洹。須菩提。於意云何。斯陀含。能作是念。我得斯陀含果不。須菩提言。不也。世尊。何以故。斯陀含。名一往來。而實無往來。

是名斯陀含。須菩提。於意云何。阿那含。能作是念。我得阿那含果不。須菩提言。不也。世尊。何以故。阿那含名爲不來。而實無不來。是故名阿那含。

問第一果。須陀洹者。知身是妄。欲入無爲之理。斷除人我執著之相。以無取心。契無得理。無取則心空。無得乃理寂。此人不入地獄。不作修羅。餓鬼異類。此謂學人悟初果也。入流者。謂捨凡入聖。初入聖流也。而無所入者。修無漏業。不入六塵。然終未能捨離塵境。不入色聲香味觸法者。厭喧求靜。六塵之境。於念未忘。所以不入色聲香味觸法也。問第二果。斯陀含者。是漸修精進之行。修無漏業念念不住六塵境界。然終未有湛然清淨之心。一往來者。謂人間報謝。一往天上。却來受生也。實無往來者。謂前念纔著。後念即覺。是無得果之心。心既無我。誰云往來。故曰而實

無往來也。第三果。阿那含者。已悟人法俱空。漸修精進。念念不退菩提之心。名爲不來者。謂能斷除內無欲心。外無欲境。已離欲界。不來受生。故名不來。心空無我。孰謂不來。故云而實無不來也。

須菩提。於意云何。阿羅漢。能作是念。我得阿羅漢道不。須菩提言。不也。世尊。何以故。實無有法。名阿羅漢。世尊。若阿羅漢作是念。我得阿羅漢道。即爲著我人衆生壽者。世尊。佛說我得無諍三昧。人中最爲第一。是第一離欲阿羅漢。

問第四果。阿羅漢者。此是梵語。由須菩提當此果也。諸漏已盡。無復煩惱。實無有法者。謂無煩惱可斷。無貪嗔可離。情無逆順。境智俱亡。豈有得果之心。我心既空。無得道念。若於道有得。於法有名。是凡夫之行。

即著我人衆生壽者相也。無諍三昧者。梵語也。唐名正定心。心無生滅。名爲正定。故云三昧。人中最爲第一。離欲阿羅漢者。能離一切欲。亦無離欲之心。微細四相。皆已滅盡愛染不生。故謂之離欲耳。

世尊。我不作是念。我是離欲阿羅漢。世尊。我若作是念。我得阿羅漢道。世尊。即不說須菩提是樂阿蘭那行者。以須菩提。實無所行。而名須菩提是樂阿蘭那行。

無我心寂。不作是念。我是離欲得道果者。若作是念。即是心有生滅。不名離欲阿羅漢也。阿蘭那者是梵語也。此名無諍心。若作是念。心有生滅。即是有諍心。須菩提。實無所行。是無生滅。所以佛許須菩提。是樂阿蘭那行者。只如今一切諸法。若於藏府中。有纖毫停留。是出網。但有所求所得。生心動念。盡是野干。若藏府中。都無所求。都無所得。此人

諸惡不生。人我不起。是納須彌於芥子中。不起一切貪嗔。是能吸四大海水。不受一切喜怒語言入耳中。於一切境。不惑不亂。不嗔不喜。刮削併當得淨潔。是無事人。勝一切知解精進頭陀。是名天眼。是名有法界性。是作車載因果。是佛出世度衆生。

莊嚴淨土分第十

佛告須菩提。於意云何。如來昔在然燈佛所。於法有所得不。不也世尊。如來在然燈佛所。於法實無所得。

於法有所得不者。如來欲破二乘之人執著之心。故有此問。白樂天問寬禪師云。無修無證。何異凡夫。師云凡夫無明。二乘執著。離此二病。是名真修也。真修者。不得勤。不得忘。勤則近執著。忘則落無明。乃爲心要耳。此是初學入道之法門也。於法實無所得者。須菩提。謂如來自性。本

來清淨。而於然燈佛所。於法實無所得。

須菩提。於意云何。菩薩莊嚴佛土不。不也。世尊。何以故。莊嚴佛土者。即非莊嚴。是名莊嚴。

莊嚴佛土者謂造寺寫經。布施供養。此是著相莊嚴。若人心常清淨。不向外求。任運隨緣。一無所得。行住坐臥。與道相應。是名莊嚴佛土。

是故須菩提。諸菩薩摩訶薩應如是生清淨心。不應住色生心。不應住聲香味觸法生心。

菩薩之心。心常空寂。無諸妄念。不生不滅。不動不搖。即是清淨心也。凡夫之心。無明起滅妄想。顛倒取捨。善惡凡聖等見。是明濁亂心也。不應住色生心者。心若清淨。即不被諸境惑亂也。

應無所住。而生其心。

衆生之心。本無所住。因境來觸。遂生其心。不知觸境是空。將謂世法是實。便於境上住心。正猶猿猴捉月。病眼見花。一切萬法。皆從心生。若悟真性即無所住。無所住心。即是智慧。無諸煩惱。譬如太空。無有罣礙。有所住心。即是妄念。六塵競起。譬如浮雲往來不定。維摩經云。欲得淨土但淨其心。隨其心淨。即佛土淨。離却有無諸法。心如日輪。常在虛空。自然不照而照。豈不是省力底事。到此之時。無棲泊處。即是行諸佛路。便是應無所住。而生其心。是你清淨法身。阿耨多羅三藐三菩提也。

須菩提。譬如有人身如須彌山王。於意云何。是身爲大不。須菩提言。甚大。世尊。何以故。佛說非身。是名大身。色身雖大。心量即小。縱如須彌山王形。有相有可量。不名大身。法身心量廣大。等虛空界。無形無相。無可比量。方名大身。

無爲福勝分第十一

須菩提。如恒河中所有沙數。如是沙等恒河。於意云何。是諸恒河沙。甯爲多不。須菩提言。甚多。世尊。但諸恒河。尙多無數。何況其沙。

如恒河中所有沙數者。一沙即爲一河。是諸河中。各有其沙河尙無數。何況其沙也。

須菩提。我今實言告汝。若有善男子。善女人。以七寶滿爾所恒河沙數。三千大千世界。以用布施。得福多不。須菩提言。甚多。世尊。佛告須菩提。若善男子。善女人。於此經中。乃至受持四句偈等。爲他人說。而此福德。勝

前福德。

甚多世尊者。謂七寶滿恒河沙數。三千大千世界。以用布施福德甚多。受持四句偈者。載應化非真分中。爲他人說。而此福德勝前福德者。若能說此大乘經義。化導衆生了悟。住無所住心。得無所得法。當知受持此經。無爲功德。勝前以七寶滿恒河沙數。三千大千世界。有爲之福德也。

尊重正教分第十二

復次須菩提。隨說是經。乃至四句偈等。當知此處。一切世間天人阿修羅。皆應供養。如佛塔廟。何況有人。盡能受持讀誦。須菩提當知是人成就最上第一希有之法。若是經典所在之處。即爲有佛。若尊重弟子。

隨說者。心無分別。理應萬差。逢凡說凡。逢聖說聖也。當知此處者。謂

此心也。如佛塔廟者。若人但爲名聞利養。心不清淨。而說是經。轉墮輪迴。有何利益。心若清淨。即常空寂。不起妄念。以此無所得心。無能解心。而說是經。令諸聽者。生清淨心。無諸妄念。是名供養。即此幻身。便是法身。中有如來全身舍利。感得天人恭敬。何殊塔廟。成就者。見性無疑也。最上第一希有之法者。佛與衆生。本無差別。若能心常清淨。不生不滅。無諸妄念。便可立地成佛。若尊重弟子者。若能行住坐臥。一切時中心無起滅浩然清淨。常修佛行。念念精進。無有間斷。所在之處。自心即佛。是名佛子。故可尊重矣。果禪師云。即心是佛。更無別佛。即佛是心。更無別心。如拳作掌。似水成波。波即是水。掌即是拳也。

如法受持分第十三

爾時須菩提白佛言。世尊。當何名此經。我等云何奉持。

佛告須菩提。是經名爲金剛般若波羅蜜。以是名字。汝當奉持。

言金剛者。堅利之物。故借金以爲喻。般若者。智慧也。爲教衆生。用智慧力。照破諸法。無不是空。猶如金剛觸物即碎。故名般若也。波羅蜜者。到彼岸也。心若清淨。一切妄念不生。能度生死苦海。汝當奉持者。只是奉持自心。行住坐臥。勿令分別人我是非也。

所以者何。須菩提。佛說般若波羅蜜。即非般若波羅蜜。是名般若波羅蜜。

佛說般若波羅蜜者。實相般若之堅。觀照般若之利。截煩惱源。達涅槃岸。即非般若波羅蜜者。既知法體元空。本無妄念。若無諸罣礙。何必持戒忍辱。湛然清淨。自在逍遙。是名即非般若也。

須菩提。於意云何。如來有所說法不。須菩提白佛言。世尊。如來無所說。

本心元淨。諸法元空。更有何法可說。二乘之人。執著人法是有。即有所說。菩薩了悟人法皆空。即無所說。是故經云。若有人言。如來有所說法。即爲謗佛。

須菩提。於意云何。三千大千世界。所有微塵。是爲多不。須菩提言。甚多。世尊。須菩提。諸微塵。如來說非微塵。是名微塵。如來說世界非世界。是名世界。

微塵者。衆生妄念。煩惱客塵。蔽淨性。喻如微塵。如是煩惱妄想。如病眼人。見空中花。如愚癡人。捉水中月。求鏡中像。枉用其心。非微塵是名微塵者。一念悟來。轉爲妙用。前念無諸妄想。湛然清淨。即非微塵。

後念不住清淨。是名微塵。非世界是名世界者。若無妄念。即佛世界。有妄念。即衆生世界。前念清淨。即非世界。後念不住清淨。是名世界。

須菩提。於意云何。可以三十二相見如來不。不也。世尊。不可以三十二相得見如來。何以故。如來說三十二相。即是非相。是名三十二相。

三十二相。謂眼耳鼻舌身。五根中。具修六波羅蜜。謂布施。持戒。忍辱。精進。禪定。智慧是也。於意根中無住無爲。是三十二相清淨行也。如來說三十二相。即是非相。是名三十二相者。此謂法身有名無相。故云非相。即悟非相。即見如來。

須菩提。若有善男子。善女人。以恒河沙等身命布施。若復有人。於此經中。乃至受持四句偈等。爲他人說。其福

甚多。

譬如有人捨身命布施。求無上菩提。此謂住相布施也。法華經云。若於外相求之。雖經萬劫終不能得。受持四句偈。載應化非真分中。爲他人說。其福甚多者。一念見性。人法俱空。即名正見。而爲他人說此經典。所得淨妙無相。無爲功德。無有限量。

離相寂滅分第十四

爾時須菩提。聞說是經。深解義趣。涕淚悲泣。而白佛言。希有世尊。佛說如是甚深經典。我從昔來。所得慧眼。未曾得聞如是之經。

須菩提聞說是經。了悟人法二空。即得中道之理。嘆其希有。感極涕零也。未曾得聞者。昔得慧眼。於有見空。今聞是經。於空亦遣。是了中道。將

欲起教。以示未來也。

世尊。若復有人。得聞是經。信心清淨。即生實相。當知是人。成就第一希有功德。世尊。是實相者。即是非相。是故如來說名實相。

信心清淨者。信本來心。無法可得。不起妄念。心常空寂。湛然清淨。即生實相者。豁然了悟。萬法由此淨心建立。是名實相。成就第一希有功德者。迷即佛是衆生。悟即衆生是佛。生佛道齊。無法等比。即是非相者。實相無相。故言爲非。不是無實相。如龜毛兔角。只說龜無毛。兔無角。不說無龜毛兔角。只說實相無相。不說無實相也。達摩云。若解實相。即見非相。若了非相。其色亦然。當於色中。不生色體。於非相中。不礙有也。正猶水中塩味。色裡膠清。決定是有。不見其形。此之謂也。

世尊。我今得聞如是經典。信解受持。不足爲難。

但止了悟人法二空。心無取捨。常令空寂。是名信解受持。如來慈悲方便。化導迷人。迷即佛是衆生。悟即衆生是佛。若能了悟。萬事皆空。以藥對病。以悟對迷。以善對惡。以靜對動。以慧對愚。種種修行。只是對治。莫作諸惡。勉力爲善。依此修行。縱橫自在。又且何難。

若當來世。後五百歲。其有衆生。得聞是經。信解受持。是人即爲第一希有。

若人心常空寂。湛然清淨。不著諸相。悟住無所住心。了得無所得法。是爲第一希有。

何以故。此人無我相無人相無衆生相無壽者相。所以者何。我相即是非相。人相衆生相壽者相。即是非相。何以

故。離一切諸相即名諸佛。

即是非相者。前言無相。即是滅色以明空義。後言非相。即是了悟我人衆生壽者四相。本來不生。故名實相。離一切相。即名諸佛者。此謂悟實相者。更無等比。當如是人。不著二邊。不處中道。一切無住。即名爲佛。又云。離相清淨。解悟三空。契合實相。究竟涅槃。三空之義。初即人空。次即法空。後即空空。三世如來。同證此理。故名爲佛。

佛告須菩提。如是如是。若復有人。得聞是經。不驚不怖
不畏。當知是人甚爲希有。

如是如是者。佛以須菩提所解空義。善契如來之法意也。不驚不怖不畏者。心若空寂。湛然清淨。等於虛空。有何驚怖。甚爲希有者。謂上根器。得聞是經。諦聽受持。永無退轉。當知是人甚爲希有。

何以故。須菩提。如來說第一波羅蜜。即非第一波羅蜜。
是名第一波羅蜜。

如來說第一波羅蜜者。若悟非相。即達彼岸。實相無二。故名第一。非第一波羅蜜者。了悟人法俱空。即無生死可度。亦無彼岸可到。何處更有第一。故云非第一也。是名第一波羅蜜者。悟一切法。即知諸法。皆是假名。法華經云。但以假名字。引導於衆生。於斯了悟。能入見性之門。是名第一波羅蜜也。

須菩提。忍辱波羅蜜。如來說非忍辱波羅蜜。是名忍辱波羅蜜。何以故。須菩提。如我昔爲歌利王。割截身體。我於爾時。無我相。無人相。無衆生相。無壽者相。何以故。

我於往昔。節節支解時。若有我相人相衆生相壽者相。應生瞋恨。

忍辱波羅蜜者。若有能忍之心。即是見有身相。不著我人衆生壽者諸非相也。如來說非忍辱波羅蜜者。了悟人法二空。即無忍辱之相。是達我人衆生壽者非相。故云非忍辱也。如我昔爲歌利王。割截身體者。如來說教方便門多。若作教相言之。只是依文設教。爲歌利王割截身體。節節支解。曾無一念瞋恨之心。肇法師云。五蘊身非有。四大本來空。將頭臨白刃。一似斬春風。應生瞋恨者。謂色身與法身。即不同也。當知割截之時。即不見有身相。亦不見有我人衆生壽者四相。何處更有瞋恨也。華嚴經云。譬如虛空。於十方中。求不可得。然非無虛空。菩薩之心。亦復如是。

須菩提。又念過去於五百世。作忍辱仙人。於爾所世。無

我相。無人相。無衆生相。無壽者相。

忍辱仙人者。如來五百世中。修忍辱波羅蜜行。欲令一切衆生。成就忍辱波羅蜜法。不著諸相。見一切人。迷悟賢愚。貧富貴賤。平等恭敬。不生輕慢。以至惡罵捶打。皆悉能忍。及生歡喜。不生瞋恨之心。

是故須菩提。菩薩應離一切相。發阿耨多羅三藐三菩提心。

應離一切相者。心常空寂。不生起滅。湛然清淨。是離一切相也。

不應住色生心。不應住聲香味觸法生心。應生無所住心。若心有住。即爲非住。是故佛說菩薩心。不應住色布施。須菩提。菩薩爲利益一切衆生。故應如是布施。

不應住色聲香味觸法生心者。心住六塵。即著諸相取舍愛憎。無有休期。應生無所住心者。心無所住。隨處解脫。內外根塵。悉皆銷殞。若一切無心。即無所住也。若心有住。即爲非住者。眞如之心。本無所住。若不住諸法相。即與道相應也。若住於法。即違正教。既違正教。即爲非住也。不應住色布施者。菩薩不見有身可捨。於諸宅舍道路。逢見一切愚癡貧賤之人。毀罵捶打。需索財物。若能隨順其意。令生歡喜。不生嗔恨之心。即是布施之義。若祇分辨是非。顧惜財寶。阻抑其意。令生嗔恨。即不名布施也。凡夫不肯空心。恐落於空。不知自心本空。愚人除事不除心。智者除心不除事。菩薩心如虛空。一切俱捨。所作福德。皆不貪著。然捨有三等。內外身心。一切俱捨。猶如虛空。無所貪著。然後隨方應物。能所皆忘。是爲大捨。若一邊行道布德。一邊旋捨。無希望心。是爲中捨。若廣修衆善。有所希望。聞法知空。遂乃不著。是爲小捨。大捨如火燭在前。

更無明暗。中捨如火燭在傍。或明或暗。小捨如火燭在後。不見坑窠也。應如是布施者。儉于自己。奢于他人。是名利益。一切衆生。若人心口相應。行解一般。是名利益于自己也。所學佛法。自然廣大。雖具見聞覺知。萬境不能染著。即是解脫了悟之人。豈無利益。

如來說一切諸相。即是非相。又說一切衆生。即非衆生。

謂能秉持律儀。修行善法。而用布施。饒益衆生。不住諸相。諸相本空。故云即是非相。

須菩提。如來是真語者。實語者。如語者。不誑語者。不異語者。

迷即種種皆妄。故不真。不實。不如。有誑。有異也。悟即一切真。一切實。一切如。不誑不異也。真語者。一切含生。皆有佛性也。實語者。一

切法空。本無所有也。如語者。一切萬法。本來不動也。不誑語者。聞如是法。皆得解脫也。不異語者。一切萬法。本自空寂。將何爲異也。

須菩提。如來所得法。此法無實無虛。

此法無實者。心體空寂。無相可得也。無虛者。內有河沙功德。用而不竭也。欲言其實。無形可觀。無相可得。欲言其虛。見能作用。是故不可言有。不可言無。有而不有。無而不無。言辭不及。其惟聖人乎。若不離相修行。無由達此法也。

須菩提。若菩薩心住於法。而行布施。如人入闇。即無所見。若菩薩心不住法。而行布施。如人有目。日光明照。見種種色。須菩提。當來之世。若有善男子。善女人。能於此經。受持讀誦。即爲如來。以佛智慧。悉知是人。悉

見是人。皆得成就無量無邊功德。

如人入闇。即無所見者。衆生之心。本自無住。無住之心。即見諸法實相。名爲菩薩。二乘之人。心住於法。不見諸法實相。背菩提路。何異凡夫。如人背明而入闇室。如人有目。日光明照。見種種色者。二乘之人。不見色而住色。譬如不見坑窞而墮坑窞。菩薩見色而不住色。譬如見坑窞不墮坑窞。一切諸法。但有假名。二乘之人。爲無慧眼。不辨真假。菩薩即有慧眼。見種種色。悉皆無相。故達摩云。不見色即是見色耳。即爲如來以佛智慧者。若人心常精進。讀誦是經。即覺慧性漸開。應當了悟實相。人法二空。不被一切善惡凡聖諸境惑亂。即同如來智慧性也。悉知悉見。是人成就功德者。三世諸佛。無不知見了悟之人。故能成就無量無邊功德。

持經功德分第十五

須菩提。若有善男子。善女人。初日分以恒河沙等身布施。中日分復以恒河沙等身布施。後日分亦以恒河沙等身布施。如是無量。百千萬億劫。以身布施。若復有人聞此經典。信心不逆。其福勝彼。何況書寫受持讀誦。爲人解說。

肇法師云。從旦至辰。名初日分。從辰至未。名中日分。從未至戌。名後日分。於此三時。乃至無量百千萬億劫。捨身布施。亦不及受持是經。見自性耳。見自性者。謂深明實相。人法二空。乃是大悟人。法華經云。瞻仰尊顏。目不暫捨。心常精進。無有間斷也。受持讀誦者。行解相應謂之受。勇猛精進謂之持。心不散亂謂之讀。見性不迷謂之誦。爲人解說者。謂已悟人。能見自性。方便爲人解說此經。令悟實相。成無上道。此爲法施。無所住相。功德無有邊際。勝前百千萬億劫。以身布施。功德百千萬

倍。

須菩提。以要言之。是經有不可思議。不可稱量。無邊功德。如來爲發大乘者說。爲發最上乘者說。

無邊功德者。若人於此經典。了悟人法二空。深明實相。功德廣大。即同佛心。無有邊際。不可稱量也。爲發大乘者說者。智慧廣大。能見自性。色空俱遣不著二邊。二邊既無。即無中道可立。不染萬境。即是大乘菩薩所行之道也。爲發最上乘者說者。不見垢穢可厭。不見清淨可求。無遣可遣。亦不言無遣。無住不住。亦不言無住。心量廣大。廓若太虛。無有邊際。即是最上乘諸佛地位也。

若有人能受持讀誦。廣爲人說。如來悉知是人。悉見是人。皆得成就。不可量。不可稱。無有邊。不可思議功德。如

是人等。即爲荷擔如來。阿耨多羅三藐三菩提。

廣爲人說。知見是人皆得成就。不可思議功德者。此謂上根器人。深明此經。了悟佛意。持此大乘經典。爲人解說。令諸學者。各見自性。無相之理。得見本源自心是佛。當知此人功德。無有邊際。不可稱量也。心佛頌云。佛即心兮。心即佛。心佛從來皆妄物。若知無佛復無心。始是真如法身佛。佛佛佛。沒模樣。一顆圓光入萬象。無體之體即真體。無相之相即實相。非色非空非不空。不動不靜不來往。無異無同無有無。難取難舍難指望。內外圓明到處通。一佛國在一沙中。一粒沙含大千界。一箇身心萬箇同。知之須會無心法。不染不淨爲淨業。善惡千端無有無。便是南無大迦葉。即爲荷擔如來。阿耨多羅三藐三菩提者。聞經解義。如說修行。廣爲人說。無相之法。令諸學者。悟明心地。能行無相無著之行。開發心中

智慧光明。離諸塵勞妄念。共成無上菩提。當知此人。負荷自性如來阿耨多羅三藐三菩提。在於身內也。

何以故。須菩提。若樂小法者。著我見人見衆生見壽者見。即於此經。不能聽受讀誦。爲人解說。

若樂小法者。凡夫愚鈍之量。不能聽信廣學無上菩提。只修福德。六道輪迴因果之法。縱使強學執著多聞。爲人解說。被明眼人覷著。手忙腳亂。一場敗闕。

須菩提。在在處處。若有此經。一切世間天人阿修羅所應供養。當知此處。即爲是塔。皆應恭敬。作禮圍繞。以諸華香而散其處。

在在處處。若有此經者。一切衆生。六根運用。種種施爲。常在法性三昧

之中。若悟此理。即在在處處有此經也。一切世間者。謂有爲之心也。天人阿修羅者。天者。逸樂心。人者。善惡心。阿修羅者。瞋恨心。但存此心。不得解脫。所應供養者。若無天人阿修羅心。是名供養。即爲是塔者。解脫之性。巍巍高顯。故云是塔也。以諸華香而散其處者。當於解脫性中。開敷知見。熏植萬行。即法界性。自然顯現。

能淨業障分第十六

復次須菩提。若善男子善女人。受持讀誦此經。若爲人輕賤。是人先世罪業。應墮惡道。以今世人輕賤故。先世罪業。即爲消滅。當得阿耨多羅三藐三菩提。

此謂若人受持讀誦此經。應合得人恭敬。今復有疾患貧窮諸衰。及爲人所憎惡。世人不達先業。將謂誦經爲善。即無應驗。遂生疑惑。殊不知若非

經力。應墮惡道。以今世人輕賤。故折三途之報。速得無上菩提。

須菩提。我念過去無量阿僧祇劫。於然燈佛前。得值八百四千萬億那由他諸佛。悉皆供養承事。無空過者。若復有人。於後末世。能受持讀誦此經。所得功德。於我所供養諸佛功德。百分不及一。千萬億分。乃至算數譬喻。所不能及。

阿僧祇劫者。梵語也。唐言不可數。供養阿僧祇恆河沙佛。施寶滿三千大千世界。捨身數如微塵。所得功德。不如有人於此經典。得悟真性。勝前所得功德。百千萬倍。達摩對梁武帝云。造寺寫經。供養布施功德。只獲人天小果。實非功德也。

須菩提。若善男子。善女人。於後末世。有受持讀誦此經。

所得功德。我若具說者。或有人聞。心即狂亂。狐疑不信。須菩提。當知是經義不可思議。果報亦不可思議。

所得功德。我若具說者。謂說悟後淨妙境界也。前爲樂小法者。謂說降住小乘之法。欲令悟入。尙猶不信。若便爲說見性大乘法。解通人曠。得必無涯。狂亂不信。徒使其狐疑也。義者。般若之義。果報者。所得功德也。由智慧而悟真性。三世諸佛。理應不異。不可思議。

究竟無我分第十七

爾時須菩提白佛言。世尊。善男子。善女人。發阿耨多羅三藐三菩提心。云何應住。云何降伏其心。佛告須菩提。善男子。善女人。發阿耨多羅三藐三菩提心者。當生如是心。我應滅度一切衆生。滅度一切衆生已。而無有一衆生

實滅度者。

云何應住。云何降伏其心者。註見善現起請分中。當生如是心者。謂二乘之人。執著諸相。起諸妄念。如來指示其心常空寂。湛然清淨。我應滅度一切衆生者。佛言我今欲令一切衆生除滅妄心。令見眞性。白樂天云。澹然無他念。虛靜是吾師。圭峰禪師云。覺諸相空。心自無念。念起即覺。覺之即無。修行妙門。惟在此也。滅度一切衆生已。而無有一衆生實滅度者。此謂不可見有衆生。是自己度者。若有此念。即著我人衆生壽者四相。即非菩薩清淨心也。

何以故。須菩提。若菩薩有我相。人相。衆生相。壽者相。即非菩薩。所以者何。須菩提。實無有法。發阿耨多羅三藐三菩提心者。

即非菩薩者。謂二乘之人。執著我人衆生壽者四相。實無有法者。謂初悟人。尚有微細四相也。但少有悟心。是我相。見有智慧。能降伏煩惱。是人相。見降伏煩惱。竟是衆生相。見清淨心可得。是壽者相。不除此念。皆是有法。故云實無有法。發阿耨多羅三藐三菩提心。

須菩提。於意云何。如來於然燈佛所。有法得阿耨多羅三藐三菩提不。不也。世尊。如我解佛所說義。佛於然燈佛所。無有法得阿耨多羅三藐三菩提。佛言。如是如是。

佛言如來於然燈佛所。有法得三菩提不者。須菩提謂。若有般若了悟心在。即是有法。尚存所得之心。故云。無有法得三菩提也。佛言如是如是者。善契如來之法意也。

須菩提。實無有法。如來得阿耨多羅三藐三菩提。須菩提

若有法如來得阿耨多羅三藐三菩提者。然燈佛即不與我授記。汝於來世。當得作佛。號釋迦牟尼。以實無有法。得阿耨多羅三藐三菩提。是故然燈佛。與我授記。作是言。汝於來世。當得作佛。號釋迦牟尼。

若有一切法。是有一切心。故云即非佛法。若無一切法。是無一切心。云何不是佛。與我授記。當得作佛。號釋迦牟尼者。如因智慧而得見性。若有能所之心。即是有法可得。性同凡夫。如何得授記耶。然無記可授。是名授記。若於心上。無纖粟停留。即是無法可得。自性清淨。故云來世。當得作佛。慈受禪師云。一顆靈丹大似拳。服來平地便升仙。塵緣若有絲毫在。蹉過蓬萊路八千。

何以故。如來者。即諸法如義。

一切諸法。本來清淨。蓋由取捨分別諸法。所以濁亂。不得自如。心若清淨。即自然如中天杲日。歷歷分明。於諸法上。都無取捨分別。即是諸法如義。

若有人言。如來得阿耨多羅三藐三菩提。須菩提。實無有法。佛得阿耨多羅三藐三菩提。須菩提。如來所得阿耨多羅三藐三菩提。於是中無實無虛。

於是中者。清淨心也。無實者。真空無分別也。無虛者。具河沙功德用也。是故如來說一切法。皆是佛法。

一切世法。皆是佛法。涅槃經云。佛即是法。法即是佛。馬祖云。一切衆生從無量劫來。不出法性三昧。長在法性中。著衣喫飯。言談祇對。六根運用。一切施爲。盡是法性。不解返源。所以隨名逐相。迷情妄起。造種

種業。若能一念回光返照。全體聖心。何處不是佛法。

須菩提。所言一切法者。即非一切法。是故名一切法。

謂於諸法。心無所得。了諸法空。本無一切法也。法華經云。諸法從本來。常自寂滅相。故古德云。用即知而常寂。不用即寂而常知。方契妙覺。是故名一切法也。

須菩提。譬如人身長大。須菩提言。世尊。如來說人身長大。即爲非大身。是名大身。

色身有相。爲非大身。法身無相。廣大無邊。是名大身。黃蘗云。虛空即法身。法身即虛空。是名大身也。

須菩提。菩薩亦如是。若作是言。我當滅度無量衆生。即不名菩薩。何以故。須菩提。實無有法。名爲菩薩。是故

佛說一切法。無我無人無衆生無壽者。

即不名菩薩者。二乘之人。若有煩惱妄想。不能除滅。即同凡夫。滅色取空。不了色性。即非菩薩。淨名經云。色性自空。非色滅空。如病眼人。見空中花。無有是處。實無有法。名爲菩薩者。一切空寂。本來不生。不見有生死。不見有涅槃。不見有善惡。不見有凡聖。不見一切法。是名見法。正見之時。了無可見。即是菩薩。故云實無有法名爲菩薩。

須菩提。若菩薩作是言。我當莊嚴佛土。是不名菩薩。何以故。如來說莊嚴佛土者。即非莊嚴。是名莊嚴。須菩提。若菩薩通達無我法者。如來說名真是菩薩。

我當莊嚴佛土是不名菩薩者。妙定經云。若人造得白銀精舍。滿三千大千世界。雖有無量布施福德。謂心有能所。即非菩薩。不如一念無能所心。

所得功德。勝前功德。百千萬倍。即非莊嚴。是名莊嚴者。實無有法。可得阿耨多羅三藐三菩提。實無有法。名爲菩薩。豈復取莊嚴相。如是即逍遙。自有無纖毫罣礙。云何是莊嚴。云何不是莊嚴。故云即非莊嚴。是名莊嚴也。通達無我法者。於諸法相。無所滯礙。是名通達。若作有所能解。是名我相。若作無所能解。湛然清淨。是名無我。故云真是菩薩。僧問馬祖云。作何見解。即得達道。答云。自性本來具足。但於善惡事上不滯。方喚作修道人。取善捨惡。觀空入定。皆屬造作。更向外馳。去家轉疎轉遠。一念妄想。便是三界生死根本。但無一念。是除生死根本。即得法王無上珍寶。

一體同觀分第十八

須菩提。於意云何。如來有肉眼不。如是世尊。如來有肉

眼。須菩提。於意云何。如來有天眼不。如是世尊。如來有天眼。須菩提。於意云何。如來有慧眼不。如是世尊。如來有慧眼。須菩提。於意云何。如來有法眼不。如是世尊。如來有法眼。須菩提。於意云何。如來有佛眼不。如是世尊。如來有佛眼。

一切凡夫。皆具五眼。而被迷心蓋覆。不能自見。若無迷心妄念。如得翳障退滅。五眼開明。見一切色也。內外空寂。名爲肉眼。見自眞性。是法平等。名爲天眼。見自性中。般若之智。名爲慧眼。見諸色相。心不動搖。見一切法。無一切法。見一切相。無一切相。是名法眼。見前際無煩惱可斷。中際無自性可守。後際無佛可求。三際清淨。是名佛眼。又云。若以無相爲法身者。名爲慧眼。而見如來。指空論有。假立名相。名爲法眼。

而見如來。若了有無。即非有無。二邊寂滅。全體法身。周徧法界者。具足佛眼。而見如來。

須菩提。於意云何。如恒河中所有沙。佛說是沙不。如是世尊。如來說是沙。須菩提。於意云何。如一恒河中所有沙。有如是沙等恒河。是諸恒河所有沙數。佛世界。如是甯爲多不。甚多世尊。佛告須菩提。爾所國土中。所有衆生。若干種心。如來悉知。

恆河沙數者。欲明衆生。有種種妄念。故舉無窮之沙。以爲喻耳。楞嚴經云。琉璃光法王子。觀世間衆生。皆是妄緣風力所轉。觀世動時。觀身動止。觀心動念。諸動無二。等無差別。此羣動性。來無所從。去無所至。十方微塵。顛倒衆生。盡同一虛妄也。若干種心。如來悉知者。眼耳鼻舌

身意。若起心動念處皆是國土。於國土中。所有衆生。若干種種差別之心。心數雖多。總名妄心。既覺是妄。故云悉知。

何以故。如來說諸心。皆爲非心。是名爲心。

覺妄之心。即是非心。本無妄念。不起妄心。即是自性本心。故云是名爲心。即是菩薩心。亦名涅槃心。亦名大道心。亦名佛心。故靈濟云。若一念心能解縛。此是觀音三昧法。

所以者何。須菩提。過去心不可得。現在心不可得。未來心不可得。

謂三世心。無性可得。故可從緣而生。肇法師云。聞說諸心。謂有實心。故須破遣。明三世皆空。故云過去已滅。未來未至。現在虛妄。三世推求。了不可得。故云。若悟無相無事。平常真心。即法體空寂。不生不滅。湛

然清淨。豈有前念今念後念可得也。馬祖云。道不用修。但莫滂染。何謂滂染但有生死。造作趣向。皆是滂染。若欲直會其道。平常心即是道。何謂平常心。無造作。無是非。無取捨。無憎愛。無凡聖。是故經云。非凡夫行。非聖賢行。是菩薩行。

法界通化分第十九

須菩提。於意云何。若有人滿三千大千世界。七寶以用布施。是人以是因緣。得福多不。如是世尊。此人以是因緣得福甚多。須菩提。若福德有實。如來不說得福德多。以福德無故。如來說得福德多。

凡夫住相布施。七寶。希求福利。此是妄心。所得福德。不足爲多。不如淨妙無住之福。無得之德。同於虛空。無有邊際。

離色離相分第二十

須菩提。於意云何。佛可以具足色身見不。不也。世尊。如來不應以具足色身見。何以故。如來說具足色身。即非具足色身。是名具足色身。須菩提。於意云何。如來可以具足諸相見不。不也。世尊。如來不應以具足諸相見。何以故。如來說諸相具足。即非具足。是名諸相具足。

心既空寂。湛然清淨。豈有色身諸相可得。凡夫既不著有。即著於空。有此斷常二見。謂觀空莫非見色。見色莫不皆空。即是具足色身。具足諸相。非具足也。空色一如。有無不異。方可能觀無身。而見一切身。無相而見一切相。是名色身具足。諸相具足也。僧問趙州云。狗子有佛性麼。州云。狗子無佛性。僧云。蠢動含靈。皆有佛性。爲什麼狗子無佛性。州云。爲

他有業識在。夫業識之人。種種著於有。起諸妄想者。此名顛倒知見。種種落於空。都無所悟者。此名斷滅知見。宿有善根之人。無此顛倒斷滅二病。能洞曉空有。此名正真知見。若悟此理。乃會隨時著衣喫飯。長養聖胎。任運過時。更有何事。

非說所說分第二十一

須菩提。汝勿謂如來作是念。我當有所說法。莫作是念。何以故。若人言如來有所說法。即爲謗佛。不能解我所說故。

心既清淨語默皆如。遇緣即施。緣散即寂。張無盡云。非法無以談空。非人無以說法。此謂不同生滅之心有法可說也。若有生滅心在而說法者。是教一切人。不能得見自性。謂之謗佛。但無生滅心。方可說法。

須菩提。說法者。無法可說。是名說法。

謝靈運曰。教傳者。說法之意也。向言無說。非杜默而不語。但無存而說。則說滿天下。無乖法理之過無存。謂不著諸相心無所住也。

爾時慧命須菩提白佛言。世尊。頗有衆生於未來世聞說是法。生信心不。佛言。須菩提。彼非衆生。非不衆生。何以故。須菩提。衆生衆生者。如來說非衆生。是名衆生。

此則魏譯偈也。長慶中。僧靈幽入冥。所指魏譯。則存。秦譯則無也。謂言若敬信佛法。即著聖見。非衆生也。若不信佛法。即著凡夫見。非不衆生。若起此二見者。是不了中道也。須是令教凡聖皆盡。不生兩頭。方是真正見解。故云。衆生衆生者。如來說非衆生。是名衆生也。

無法可得分第二十二

須菩提白佛言。世尊。佛得阿耨多羅三藐三菩提。爲無所得耶。佛言。如是如是。須菩提。我於阿耨多羅三藐三菩提。乃至無有少法可得。是名阿耨多羅三藐三菩提。

若有少法可得。亦是著相。誌公云。但有纖毫。即是塵。舉意便遭魔所擾。經云。若人欲識佛境界。當淨其意如虛空。學道之人。但於一切諸法。無取無捨。見如不見。聞如不聞。心如木石。刮削併當。令內外清淨方是逍遙自在底人。琪禪師云。念念釋家出世。步步彌勒下生。分別現文殊之心。運用動普賢之行。門門而皆出甘露。味味而盡是醍醐。不出旃檀之林。長處華藏之境。若如此也。行住坐臥。觸目遇緣。雖應用千差。且湛然清淨。

淨心行善分第二十三

復次。須菩提。是法平等。無有高下。是名阿耨多羅三藐

三菩提。以無我無人無衆生無壽者。修一切善法即得阿耨多羅三藐三菩提。

是法平等無有高下者。凡夫不見自性。妄識分別。自生高下。諸佛是高。衆生是下。菩薩了悟人法二空。上至諸佛。下至螻蟻。皆有佛性。無所分別。故一切法皆平等。豈有高下也。黃蘗云。欲觀佛作清淨光明解脫之相。觀衆生作垢濁暗昧生死之相。作此解者。歷恆河沙劫。終不能得阿耨菩提。又云。心若平等。不分高下。即與衆生諸佛。世界山河。有相無相。徧十方界。一切平等。無彼我相。此本源清淨心。常自圓滿光明徧照也。百丈云。若人於一切事。無染無著。於一切境。不動不搖。於一切法。無取無捨。於一切時。常行方便。隨順衆生。令皆歡喜。而爲說法。令悟菩提真性。此即名爲修善法也。

須菩提。所言善法者。如來說即非善法。是名善法。

不住相故。即非善法。無漏福故。是名善法。法華經云。初善中善後善者。初。謂發善心時。須是念念精進。不生疑惑懈怠之心。中。謂常修一切善法。令悟真性。不著諸法相也。後。謂即破善法。直教一切善惡凡聖。無取憎之心。平常無事。故云。即非是名善法也。

福智無比分第二十四

須菩提。若三千大千世界中。所有諸須彌山王。如是等七寶聚。有人持用布施。若人以此般若波羅蜜經。乃至四句偈等。受持讀誦。爲他人說。於前福德。百分不及一。百千萬億分。乃至算數譬喻所不能及。

聚七寶布施。如三千大千世界中。須彌山王。所得無量無邊福德。此爲住

相布施。終無解脫之期。不如受持讀誦此經。乃至四句偈等。所得無住相淨妙功德。勝前功德百千萬倍。

化無所化分第二十五

須菩提。於意云何。汝等勿謂如來作是念。我當度衆生。須菩提。莫作是念。何以故。實無有衆生如來度者。若有衆生如來度者。如來即有我人衆生壽者。

實無有衆生如來度者。如來不見有衆生可度。又云。謂諸衆生。起無量無邊。煩惱妄想。於一切善惡凡聖等見。有取捨分別之心。迷情蓋覆菩提之性。佛出于世。教令覺悟。降六賊。斷三毒。除人我。若能了悟人法二空。無諸妄念。心常空寂。湛然清淨。更不留纖毫滯礙。即是見性。實無衆生可化度也。若有衆生如來度者。即有我人衆生壽者者。人人具足。箇箇圓

成。本來是佛。與佛無異。圓悟禪師云。赤肉團上。人人古佛家風。毘盧頂門。處處祖師巴鼻。若也恁麼返照。凝然一段光明。非色非心。非內非外。行棒也打他不著。行喝也驚他不得。直得淨裸裸。赤灑灑。是箇無生法忍。不退轉輪截斷兩頭。歸家穩坐。正當恁麼時。不須他處覓。祇此是西方。

須菩提。如來說有我者。即非有我。而凡夫之人。以爲有我。須菩提。凡夫者。如來說即非凡夫。是名凡夫。

有我者。即是凡夫。非我者。隨處作主。應用無方。故云。凡是佛因。佛是凡果。境界經云。三世諸佛。皆無所有。唯有自心。既明因果無差。乃知心外無法。二乘之人。執有我相。欲離生死。而求涅槃。欲捨煩惱而求滅度。是捨一邊。不了中道。乃同凡夫行也。即非凡夫者。一念清淨。非

凡非佛。故云。即非凡夫。凡夫亦空。迷者妄執但無執著。即一切清淨耳。

法身非相分第二十六

須菩提。於意云何。可以三十二相觀如來不。須菩提言。如是如是。以三十二相觀如來。

空生疑謂。衆生是有。可化成聖。法身不無。可以妙相而見之也。

佛言。須菩提。若以三十二相觀如來者。轉輪聖王即是如來。須菩提白佛言。世尊。如我解佛所說義。不應以三十二相觀如來。爾時世尊。而說偈言。

轉輪聖王。即是如來者。佛以近事質之。令其自解。又云。未達我人衆生壽者四相。即是心有生滅。生滅即是轉輪義。王者。心也。雖修三十二淨行。生滅心轉多。終不契清淨本來心。故云。不應以三十二相觀如來也。

若以色見我。以音聲求我。是人行邪道。不能見如來。

音聲色相。本自心生。分別之心。皆落邪道。若能見無所見。聞無所聞。知無所知。證無所證。體此妙理方見如來。

無斷無滅分第二十七

須菩提。汝若作是念。如來不以具足相故。得阿耨多羅三藐三菩提。須菩提。莫作是念。如來不以具足相故。得阿耨多羅三藐三菩提。須菩提。汝若作是念。發阿耨多羅三藐三菩提心者。說諸法斷滅。莫作是念。何以故。發阿耨多羅三藐三菩提心者。於法不說斷滅相。

如來不以具足相故者。佛恐須菩提落斷滅見。是故令離兩邊。然性含萬法。本自具足。應用徧知。一即一切。一切即一。去來自由。無所罣礙。此法

上至諸佛。下至含識。本無欠少。是名具足相也。說諸法斷滅。莫作是念者。諸法性空。空寂是常。是故不斷不滅。若作念云。無相而有道心者。是斷一切行。滅一切法。此非中道也。又云。若作有相觀。即是一邊見。若不作有相觀。即是斷滅法。故知真如法性。不是有。不是無。湛然不動。觀與不觀。皆是生滅。故云莫作是念也。於法不說斷滅相者。見性之人。自當窮究此理。若人空心靜坐。百無所思。以爲究竟。即著空相斷滅諸法。

不受不貪分第二十八

須菩提。若菩薩以滿恆河沙等世界七寶。持用布施。若復有人。知一切法無我。得成於忍。此菩薩勝前菩薩所得功德。

知一切法無我者。一切萬法。本來不生。本來無我相。所得功德。即非七

寶布施等福所能比也。得成於忍者。既知人法無我。則二執不生。成無生忍。此乃勝前七寶布施菩薩。夫萬法本來無性。皆用自己之所顯法耳。如眼對色謂之見。耳對聲謂之聞。見聞是根。色聲是塵。色聲未對之時。我性常見常聞。未曾暫滅。色聲相對之時。我性未嘗暫生。此是菩薩了悟真性。活潑潑地。洞然同於太虛。所以不曾生滅。凡夫即被妄心所覆。隨六塵轉。即有生滅故塵起即心起。塵滅即心滅。不知所起滅心。皆是妄念也。若見六塵起滅不生。即是菩提。

何以故。須菩提。以諸菩薩不受福德故。須菩提白佛言。
世尊。云何菩薩不受福德。須菩提。菩薩所作福德。不應
貪著。是故說不受福德。

不貪世間福德果報。謂之不受。又云。菩薩所作福德。不爲自己。止欲利

益一切衆生。此是無所住心。即無貪著。故云不受福德。

威儀寂靜分第二十九

須菩提。若有人言。如來若來若去若坐若臥。是人不解我所說義。何以故。如來者。無所從來。亦無所去。故名如來。

來無所從。去無所至。來去皆如。其誰來去。又云。無所從來者。不生。亦無所去者。不滅。不生者。謂煩惱不生。不滅者。謂覺悟不滅也。又云。知色聲起時。即知從何而來。知色聲滅時。即知從何而去。故色聲香味觸法。自有起滅。我心湛然。豈有來去生滅相耶。寂而常照。照而常寂。行住坐臥。四威儀中。無不清淨也。

一合理相分第三十

須菩提。若善男子善女人。以三千大千世界。碎爲微塵。於意云何。是微塵衆。甯爲多不。須菩提言。甚多。世尊。何以故。若是微塵衆實有者。佛即不說是微塵衆。所以者何。佛說微塵衆即非微塵衆。是名微塵衆。世尊。如來所說三千大千世界。即非世界。是名世界。

微塵者。妄念也。世界者。身之別名也。微塵是因。世界是果。微塵世界者。謂因果也。然自己眞性。非因非果。能與六道衆生爲因果也。謂自性是因。六道是果。故知微塵起於世界。輪迴由於一念。雖見小善。不可執著。雖逢小惡。必須除去。且衆生於妄念中。起貪瞋癡業。妄受三界夢幻之果。如彼微塵。積成世界。不知因果元是妄心。自作自受。一念悟來。即無微塵。世界何有。故云。即非微塵。是名微塵。即非世界。是名世界。

若欲建立世界。一任微塵熾然。若欲除滅世界。覺悟人法俱空。了無一法可得。湛然清淨。不被諸境所轉。皆由於自己也。

何以故。若世界實有者。即是一合相。如來說。一合相。即非一合相。是名一合相。須菩提。一合相者。即是不可說。但凡夫之人。貪著其事。

微塵謂因。世界謂果。若執因果爲實有者。即被相之所縛。故云。即是一合相。但莫執爲實有。亦莫執爲實無。於相離相。故云即非一合相。是名一合相也。即是不可說者。須是學人自省自悟。於理事上。各無罣礙。今凡夫一何貪著事相。不達於理。所以說因果著因果。說世界著世界。逍遙翁云。學道之人。但只了悟靈明之心。是謂本源。所以念念妄想。皆爲塵垢。勿令染著。久當證知清淨法身也。

知見不生分第三十一

須菩提。若人言佛說我見人見衆生見壽者見。須菩提。於意云何。是人解我所說義不。不也。世尊。是人不解如來所說義。何以故。世尊說我見人見衆生見壽者見。即非我見人見衆生見壽者見。是名我見人見衆生見壽者見。須菩提。發阿耨多羅三藐三菩提心者。於一切法。應如是知。如是見。如是信解。不生法相。須菩提。所言法相者。如來說。即非法相。是名法相。

佛說般若金剛之法。始即令諸學人。先除粗重四相。如大乘正宗分中說也。次即令見自性之後。復除微細四相。如究竟無我分中說也。此二分中。即

皆顯出理中清淨四相。若於自心。無求無得。湛然常住。是清淨我見。黃蘗云。百種多知。不如無求最第一。諸學道人。若欲得成佛。一切佛法。總不用學。但學無求無著。無求即心不生。無著即心不滅。不生不滅。便是佛也。若見自性。本自具足。是清淨人見。於自心中。本無煩惱可斷。是清淨衆生見。自性無變無異。無生無滅。是清淨壽者見。故云。即非我人衆生壽者見。是名我人衆生壽者見也。發阿耨多羅三藐三菩提心者。應知一切衆生。皆有佛性。應是一切衆生。無漏智慧本自具足。應信一切衆生。靈源眞性。無生無滅。若能了悟此意。即是一切智慧不作有能所心。不存知解相。口說無相法。心悟無相理。常行無相行。故云不生法相。是名法相也。

應化非眞分第三十二

須菩提。若有人以滿無量阿僧祇世界七寶。持用布施。若有善男子善女人。發菩提心者。持於此經。乃至四句偈等。受持讀誦。爲人演說。其福勝彼。云何爲人演說。

發菩薩心者。謂大乘最上乘種性人也。持於此經四句偈等受持讀誦者。七寶有竭。四句無窮。悟達本心。了無所得。持於此經。其福勝前七寶布施之功德也。云何爲人演說者。四大色身。不解說法聽法是你面前孤明歷歷。通徹十方底。解說解聽。莫要記他語言。縱饒說得天花亂墮。其心不曾增。便摠不說。其心不曾滅。求著轉遠。學者轉疏。惟在默契悟者自知也。

不取於相。如如不動。

此謂悟達無心無相。可取之人。若是有心。不取於相。卻是取相。心本是空。相亦是空。人法俱空。有何可取也。真淨文禪師云。但無一切心。自

然合天道。應用在臨時。莫言妙不妙。如如不動者。學人若謂我知也。學得也。契悟也。解脫也。似此見解。皆是有動心。即是有生滅。若無此心。即一切法。皆攝不動。不動即內外皆如。故云如如不動也。

何以故。一切有爲法。如夢幻泡影。如露亦如電。應作如是觀。

一切有爲法者。生老病死。貧富貴賤。士農工商。赤白青黃。馨香臭穢。有無虛實。深淺高低。皆是妄心起滅。有爲之法也。如夢幻泡影。如露亦如電者。一切有爲之法。即是世間萬事。皆如夢幻泡影。不得久長。夢者。妄想也。幻者。幻化也。泡者。如水上之泡。易生易滅也。影者。如身之影無所捉撮也。露者。霧露之露。不得久停也。電者。雷電之電。頃刻之光也。應作如是觀者。有爲無爲皆由自己。心常空寂。湛然清淨。無纖毫停

留罣礙。自然無心。如如不動。應作如是觀也。

佛說是經已。長老須菩提。及諸比丘。比丘尼。優婆塞。優婆夷。一切世間天人阿修羅。聞佛所說。皆大歡喜。信受奉行。

夫至理無言。真空無相。謂都寂默也。但不著言語。不著知解。即是無言無相。金剛經之旨趣。本謂此也。是以旋立旋破。止要諸人。乃至無有少法可得。即不被一切諸境所惑。若得心地休歇。即謂之清淨心。亦謂之本來心。亦謂之到彼岸。亦謂之涅槃。亦謂之解脫。其實一也。張無盡云。傳大士。龐居士。豈無妻子哉。若也身處塵勞。心常清淨。便能轉識爲智。猶如握土成金。一切煩惱。皆是菩提。一切世法。皆是佛法。若能如是。即是在家菩薩。了事凡夫。豈不踴歎。



迴向偈

願以此功德
莊嚴佛淨土
上報四重恩
下濟三塗苦
若有見聞者
悉發菩提心
盡此一報身
同生極樂國

金剛般若波羅蜜經註

- 倡印單位：財團法人文殊文教基金會
- 發行流通處：高雄文殊講堂
- 住 址：高雄市前鎮區嘉陵街六號
- 電 話：(〇七) 三三二七八三三
- 網 址：www.wenshu.org.tw
- 郵政劃撥：〇四七八九八五一（林益謙）
- 承 印 者：鴻順彩色印刷製版股份有限公司
- 住 址：高雄市三民區中峰街一九號
- 電 話：(〇七) 三一六二二四六
- 西元二〇〇四年七月三刷 恭印二萬伍仟本
- 非賣品·歡迎助印

